

# Es mörderisches Gschpräch

Mörderisches Gschpräch ( Umberto & Salvatore)

Aes isch e schöne warme Summertag. D'Luft flimmeret ir Mittagshitz. D'Mönsche wo z'Fuess ungerwägs si, drücke sech a de Huuswäng no. Im Schatte isches einigermasse uszhaute. Si bewege sech langsam und träg . Die Meische si i Gedanke ir Badi, oder am sünnele ame Fluss- oder Seeufer.

Plötzlech g'hörtme s'Quiitsche vo Outopnö. Denn lamentiere zue Manne luut, ime schtarch südländisch aaghuchte Dialäkt: "Muesche eini Bizzeli ufpass, auti Maa wenn du wotsche über die Schtross loufe, süsche du chumme unger di Outo und bisch mage gabutt".

"Dase do ische die Bahnhofschtross und nid die Rennschtreggi vo di Monza! Unde dini Büchse isch eini Toppolino und nid eini Ferrari, ou wennisch rot, vo die Rroscht, du cheibe Tschingg".

"Wieso du mir säge Tschingg, wenn du säubere bisch eini Tschingg? Wo du här cho? ,Du gsesche us wie ou scho einisch Krache gha mite mir"!

"Die Narbe do a mini Schtirne ische vo mini Colege , Hei mir zäme boue die nöii Coop-Filiale , het er mir eini Schtei lo uf di Gring g'heie, dä cheibe Tschingg"!

"Hette abere nide vüu gmacht a dini Chopfe, du immer no glychi blödi Schnorri wie früechere,.... Umbeeeertoooo!"

Si hei sech umarmet und ihres Zämeträffe nach so langer Zyt, z'mitz uf der Schtross, nach südländischer Manier gfiiret. D'Passante wo nid aues genau hei mitübercho, hei vorsichtshauber mou d'Polizei benachrichtiget. Wo du die ändlech cho si, hocke die zue Italiäner gmütlech ime Hingerhof vore Beiz, bimene Boccalino Lambrusco.

Lang isches här sit si sich z'letschte Mou hei gseh. Und s'git vüu z'verzöue

Wenn nume s'Erbe nid wär !

Aber das isch doch wichtig, das isch schliesslech üse Lohn.

Vielicht hesch rächt, aber so wie das hütt louft, machts mir ke Fröid meh.

Säg nume s'heig di bis jetz gfröit, Lüüt umzbringe, du cheibe Sadischt !

Gfröit isch chly ä gäche Usdruck, sägemers eso,

es hett mir kei Chopfweh gmacht, eine is Jensits z'befördere.

Wieso hesch de plötzlech äs Problem mit de Chöle?

S'Gäut macht mir keini Sorge, nume das ganze Theater drumume geit mir ufe Geischt.

Machs nid spannend, verzöu !

Früecher het me eim eifach mit em Morgeschtärn ä nöii Frisur zouberet, oder mit äm Schwärt chly abschnitte wos zvüu isch gsi.

A jedem Husegge hesch Pülverli und Säftli chönne choufe und s'het niemer gross interessiert, was 'd mit wosch mache. Hesch dir eifach eine usgsuecht, ne zwäggschützt uf die richtig Grössli und sech ihm sini Habseligkeite aageignet. Das het mir mi Grossvatter gseit, die hei das gäng so gmacht, scho sit Generazione.

D'Versicherige zahle hüt nüm eifach eso,  
Wenn si Zwifu hei am ordentleche Abläbe vome Chund,  
buddle si ne wieder us und ungersuechene

De chöi si dir ganz genau säge, was du für ne Chätschgummi hesch im Muh gha,  
wodne d'Chäuerschtäge ab gmüpft hesch !

So isch das nüm so eifach, dä Job suber z'mache, das isch das wo mir Sorge macht.

Wenn es Unsicherheite git, b'haute si s'Gäud zrug und mir göh läär us Schliesslech si mir Profis. Mir Läbe vo der Schtärbehüuf. Mir si Schpezialischte uf däm Gebiet. Bis jetz het sech emu no keine beschwärt wo mir hei uf d' Reis gschickt.

Aes wird haut gäng echli änger uf däm Märit.

Hüt het jede s'Gfüu, är chönn das ou.

De chöme d'Amatöre und pfusche im Züg ume,  
und mache d'Lüüt Chopfschüüch, und d'Prise kabutt!

Derbi hätti doch jede Mönsch s'Rächt,  
uf die agmässnigshti Art abserviert z'wärde.

Kreativität isch gfrogt, grad bi üsem Schaffe.

Aber hütt wott sich haut niemer meh d'Finger dräckig mache.

Aes mues müglechscht schnäu und ohni grosse Ufwand goh.

So passiert es immer hüfiger, dass d'Chunde ganz ordinär erschosse,  
oder vor ne Laschtwage gschüpft wärde.

Do zauht haut de niemer und mir  
schtärbe mit dr Zyt uus.

Z'lentsch müesse mir üs de no ine Grossmetzgerei go bewärbe, dass mir überhaupt öppis z'kille hei.

I bi der Meinig, dass mir zrug müesse:back to the roots isch's Motto.

Chürzlech hani eim zuegluegt, dä hett das ufe ganz eifachi handgschtrickti Art gmacht.

Wonine gseh ha, hani genau gwüsst, was är im Sinn het. Die Sach isch ziemlich durchsichtig gsi. Dr Erfoug isch buechschtäblech amne Fädeli g'hanget.

Wenn ig ihm hätt dripfuschet ,wär die Sach blitzartig bachab gange.  
I ha dä Typ scho lenger gseh umeschliche. Aer hett sis Aktionsgebiet genau uskundschaftet gha.

Aes isch amne sunnige warme Morge gsi, wonär sich zum zueschloh entschide hett.  
Sis Opfer het sich ar Sunne usgrueht. Mit haubgschlossnige Ouge loht es sich d'Sunne lo ufe Buggu schyne.

Dr Mörder luegt churz übere Gartehaag, denn macht är sich ufe Wäg zu sim Opfer.  
Aer kennt jede Schtei ,jedes Hinderniss uf sim Wäg.

Zielschtrebig geit är uf sis Opfer zue. Konzentriert luegt är uf sis Ziu, nüt chane jetz me ablänke oder ufhaute. Sis loufe isch elegant, majestätisch, fasch chönnt me meine är schwäbi über d'Schteine.

Ae richtige Profi äbe.

Wo aues verbi isch gsi ischer haschtig dervogloufe . Dörthi won är härcho isch.  
Nach es paar Minute isch är, gloubsch es nid, wieder umecho wie wenn nüüt wär passiert gsi.

Zu auem Ueberfluss lit är jetz genau dört ad'Sunne won är vor paar Minute Platz gmacht het.

Du verzöusch mir doch do irgend ä Seich, öppis wos nid git.

Du luegsch doch nid eifach zue wenn öpper umbrocht wird.

Hesch de wenigstens är Polizei aaglütet?

Gloubsch die hätte Fröid,weme gäng würd telefoniere, wenn ä Moudi äs Vögeli frisst.

Zudäm isch dä Vogu chrank gsi, süsch wär dä ab bevor s'Büsi ir Nöchi isch gsi.

Jetzt hani Durscht, nimmsch ou no ä Bocalino, dä Lambrusco isch süffig.

Darf i di zum z'Nacht ilade?

Mini Frou d'Rosana chochet äs ganz bsungers guets Risotto.

Schön, de chöi mir no chli witer brichte, was mir für schlimmi

Mafia-Gsöue worde wäre, wenn mir denn aus Teenis nid ufe Bou wäri go chrampfe!